

starogradski

OPĆINA STARI GRAD
SARAJEVO



MUNICIPALITY OF STARI
GRAD SARAJEVO

haberi

BESPLATAN PRIMJERAK • JUNI 2014. broj 22.




Spektakl na
Latinskoj ćupriji

Sadržaj

- 2-3 Obilježavanje stogodišnjice početka Prvog svjetskog rata
- 4-5 Poplave i akcije pomoći poplavljenim područjima
- 7 Aktuelni projekti
- 8 Realizovan projekat: "Virtualni vodič"
- 10-13 Dani Općine Stari Grad
- 14-15 Komunalni projekti
- 18 Predstavljamo uspješne male privrednike iz Starog Grada
- 19 Staro Sarajevo: Sarajevski atentat



Skenirajte webcode mobilnim telefonom



Impressum

Izdavač: Općina Stari Grad Sarajevo
Tiraž: 2.000
Pripremili: Almedina Porča, Alma Imamović, Safet Mališević
DTP: Safet Mališević
Fotografije: Safet Mališević
Photo naslovna: Nedim Grabovica
Štampa: "Pentagram" d.o.o.
Adresa: Zelenih beretki br. 4, 71000 Sarajevo
web: www.starigrad.ba
e-mail: info@starigrad.ba
Tel./fax: +387 33 282 385

Aktuelno



Stari Grad ponovo u fokusu svjetske javnosti

Obilježena stogodišnjica početka Prvog svjetskog rata...Vijećnica u punom sjaju ugostila Bečku filharmoniju...Spektakl u slavu stoljeća mira na Latinskoj ćupriji

Stogodišnjica početka Prvog svjetskog rata, 28. juni, 2014. godine, u Sarajevu je obilježena brojnim kulturnim sadržajima, a većina ih se odigrala upravo u Starom Gradu. Na dan kada je, prije stotinu godina, izvršen Sarajevski atentat, Muzej Sarajeva je, u depandansu "Sarajevo 1878-1918", upriličio različite sadržaje: na mjestu gdje je u vrijeme Austro-Ugarske nakratko bio postavljen spomenik Franzu Ferdinandu i njegovoj supruzi Sofiji postavljena je informativna tabla sa osnovnim informacijama o spomeniku, a na mjestu gdje se nalazio umjetnički rad Voje Dimitrijevića "Stope Gavrila Principa", također je postavljena informativna tabla sa opisom i fotografijom ovog djela. Veliki baner na zgradi Muzeja je

urađen u saradnji sa Akademijom likovnih umjetnosti, kao najbolji rad konkursa za idejno rješenje označavanja mjesta Atentata.

Posebnu atrakciju predstavljao je automobil, urađen u potpunosti prema originalu automobila u kome su se vozili Ferdinand i Sofija, a koji je bio parkiran i izložen ispred Muzeja. Automobil je rad zaljubljenika u oldtimere i automobilizam, Ede Kapetanovića.

Bečka filharmonija u sarajevskoj Vijećnici

Istog dana, u poslijepodnevni satima, malo dalje od mjesta atentata, u parku preko puta Vijećnice okupilo se više stotina građana iz Sarajeva, BiH, ali i

Peticija, izložbe, filmovi, koncerti

Francuski filozof Bernard-Henri Levy, povodom stogodišnjice, pokrenuo je online peticiju za trenutno počinjanje pregovora između EU i BiH o prijemu naše zemlje u punopravno članstvo EU. Arhiv FBiH priredio je međunarodnu izložbu "Sarajevski atentat" ispred Katedrale. Na 12 panoa postavljene su fotografije posljednjeg putovanja Franza Ferdinanda. Premijerno je prikazan filmski omnibus "Mostovi Sarajeva", sa 13 kratkih filmova evropskih reditelja CinéTévÉ, Sarajevo Film Festivala, Mission du Centenaire i Francuskog Instituta u BiH. U Bosanskom kulturnom centru održani su koncerti sevdaha Ansambla HALKA i Amire Medunjanin.



Bečka filharmonija oduševila koncertom u Vijećnici

Australije, Kine, Japana, Engleske, Francuske, Njemačke, Austrije i brojnih drugih zemalja, koji su putem video zida pratili muzički spektakl iz Vijećnice. Naime, povodom obilježavanja stogodišnjice početka Prvog svjetskog rata, u Vijećnici je upriličen veličanstveni muzički događaj u izvedbi Bečke filharmonije. Među gostima koncerta bili su i predsjednici Austrije, Hrvatske, Crne Gore, Makedonije, članovi Predsjedništva BiH, visoki predstavnik i druge visoke zvanice.

Koncert je počeo intoniranjem himne Bosne i Hercegovine u izvedbi filharmonije, a uslijedila su djela Josepha Haydna, Franza Schuberta, Alban Berga, Johannesa Brahmsa i Maurice Ravela.

Oda radosti Ludwiga van Beethovena,

himna Evropske unije, završila je ovu veličanstvenu izvedbu jedne od najpoznatijih i najstarijih svjetskih filharmonija.

Stoljeće mira nakon stoljeća ratova

Petnaest minuta prije ponoći na Latinskoj ćupriji počeo je multidisciplinarni spektakl autora Harisa Pašovića "Stoljeće mira nakon stoljeća ratova", koji je uključivao integrirani ples, dramu, muziku, pjevanje, horsko pjevanje i video.

Nastupilo je više od 300 umjetnika, muzičara, pjevača, glumaca i plesača iz 12 zemalja, a među njima i Dino Mer-

lin, Šaban Šaulić, Eldin Huseinbegović, hor Opere Narodnog pozorišta Sarajevo, Kubanjski kozački hor iz grada Krasnodara u Rusiji, operski pjevač Nicolas Simea iz Pariza, klapa Cambi iz Kaštela, balet Hrvatskog narodnog kazališta iz Zagreba, plesni centar Tala iz Zagreba, te duhački kvartet iz Sarajeva.

Dini Merlinu koji je izašao na scenu i otpjevao "Je l' Saraj'vo gdje je nekad bilo", pridružili su se svi učesnici, a podizanjem velikog crvenog srca iz Sarajeva je poslana poruka mira i ljubavi, za stoljeće mira nakon stoljeća ratova.

Ovaj projekat, čiju produkciju je radio East West Centar, podržala je i Općina Stari Grad, a finansirala ga je Evropska unija.



Biciklistička utrka: "Sarajevo Grand Prix"

Održan Sarajevo Grand Prix

U Sarajevu je, povodom obilježavanja stogodišnjice, 22. juna održana biciklistička utrka Sarajevo Grand Prix. Osim 1.800 rekreativaca, takmičilo se i više od 120 profesionalnih biciklista iz 25 zemalja. Treće mjesto osvojio je Christian Delestele, drugo Andre Vacher, dok je prvo mjesto osvojio Marin Matej koji je osvojio i dres za najbržeg biciklistu uzbrdo. Specijalno za ovu priliku u Sarajevo su stigli šampioni i direktor Tour de France-a.

Poplave



Poplave u Starom Gradu

Bistrički potok se izlio, Miljacka srušila zid... Općina se odmah uključila u akcije pomoći ugroženima... Vijeće odobrilo sredstva za ugrožene... Pobratimske općine priskočile u pomoć

O bilne padavine koje su dovele do poplava i pokretanja klizišta širom Bosne i Hercegovine, koje su sredinom maja zahvatile našu zemlju, nisu zaobišle ni Stari Grad.

Operativni centar Civilne zaštite Kantona Sarajevo obavijestio je općinsku službu Civilne zaštite 13. maja u 02:30 sati da je došlo do izljevanja Bistričkog potoka, na adresi Boguševac do br.48. Utvrđeno je da je došlo do začepljenja kanala Bistričkog potoka usljed velikih količina drveća i raznog otpada koje je voda donijela iz pravca Trebevića. Pripadnici DVD Vratnik odmah se pristupili raščišćavanju otpada kako bi kanal bio što prije pročepljen i situacija se normalizovala. Tokom iste noći došlo je i do izljevanja Čolinog potoka, iznad MZ Babića bašča. Voda se izlila na ulicu, ali nije ugrozila okolne kuće. Došlo je i do izljevanja rijeke Moščanice na mostu nedaleko od samog izvora, gdje su odmah postavljene vreće sa pijeskom. Oko 150 vreća sa pijeskom postavljeno je na dvije lokacije: Moščanica i u blizini Inat kuće.

Najveći problemi zbog Miljacke

Iako bi se mnogi iznenadili, najveće probleme u Starom Gradu izazvala je upravo rijeka Miljacka zbog nezapamćeno visokog vodostaja od 244 cm. Iz tog razloga je bio privremeno zatvoren most na Drveniji, a najveći problem nastao je u koritu rijeke. Naime, kod mosta Ćumurija došlo je do obrušavanja zida u koritu Miljacke zbog čega je obustavljen i gradski saobraćaj. Radovi na sanaciji su trajali oko 15 dana.

S obzirom na jake i obilne kiše i na dijelu Baščaršije došlo je do poplava. Do plavljenja podrumskih prostorija objekata na Baščaršiji došlo je jer se nalaze ispod nivoa Miljacke. U ulici Bravadžiluk, poplavilo je sedam objekata.

Prvi rezultati sumirane štete pokazali su da je poplavljeno 38 objekata, od čega 19 privatnih i 19 privrednih. U Općini Stari Grad je prije majskih padavina bilo registrovano 99 klizišta, a nakon toga ih je aktivirano još 12, dakle ukupno 111 klizišta. Brana na Bentbaši je tokom poplava bila pod kontrolom.

Operativni štab Civilne zaštite zas-

Komisija procijenila štete

Komisija za procjenu šteta nastalih usljed poplava i klizišta u Općini Stari Grad obišla je 40-ak lokacija na kojima su građani prijavili štetu. Radi se o štetama na putnoj infrastrukturi, privatnim objektima i drugoj šteti prouzročenoj prilikom prirodne nesreće.

Prema informacijama iz Službe civilne zaštite Općine Stari Grad, prvo će se pristupiti rješavanju problema putne infrastrukture, s obzirom da su obilne padavine dovele do urušavanja saobraćajnica, ispupčenja asfalta i slično.

Ustanovljeno je da je prioritet sanacija klizišta i ulice Prvi bataljon na Sedreniku, te otvora na putu koji se nalazio na raskrsnici ulica Bistrik brijeg i Pastrma. Sanacije pomenutih ulica su završene u junu mjesecu i za te namjene Općine je izdvojila 29.000 KM.

Donacija za biblioteku u Maglaju

Gradska biblioteka u Maglaju ponovo će otvoriti svoja vrata korisnicima zahvaljujući naporima i donacijama Općine Stari Grad, Fond memorijala Kantona Sarajevo i starogradskih osnovnih škola. Fonda memorijala KS biblioteci je donirao 127 naslova knjiga, a Općina je animirala uposlenike osnovnih škola da daju svoj doprinos. Sve starogradske osnovne škole su se odazvale ovoj akciji i prikupljena je znatna količina knjiga, dok je Općina Stari Grad donirala oko 400 naslova.

jedao je prvog dana poplava i usvojio Odluku o korištenju sredstava planiranih budžetom Općine Stari Grad za čišćenje kompletnog Bistričkog potoka kako bi se ubuduće spriječile velike poplave.

Odmah se uključili u akcije pomoći poplavljenim područjima

Općina Stari Grad se među prvima uključila u akcije pružanja pomoći poplavljenim područjima.

U mjesnim zajednicama je već 16. maja počela akcija prikupljanja humanitarne pomoći. Desetine tona pomoći donirali su građani Starog Grada, u vidu namirnica, odjeće, higijenskih potrepština, namještaja, bijele tehnike i

drugog i isporučili u Zavidoviće, Maglaj, Topčić polje i Željezno polje. Općina je obezbijedila i lopate, ašove, grablje i drugi alat potreban za čišćenje za 400 studenata koji su iz Sarajeva otišli da pomognu čišćenje Maglaja. Stanovništvu Općine Olovo upućeno je 20. maja 50 paketa vode i 50 paketa sa osnovnim životnim namirnicama.

Odmah po saznanju za stradanja stanovnika Općine Vogošća, koji su izgubili domove u klizištu u naselju Svrake, uposlenici Općine Stari Grad i vijećnici Općinskog vijeća odlučili su prikupljati finansijsku pomoć. Prikupljena sredstva su uplaćena na račun Općine Vogošća koja ih je dalje rasporedila ugroženim porodicama.

Vijeće preusmjerilo 100.000 KM u Fond za pomoć

Općinsko vijeće Stari Grad odlučilo je na 19. sjednici da se stavlja van snage odluka sa prethodne sjednice o preusmjeravanju 100.000 KM namijenjenih za realizaciju i sufinansiranje projekata iz oblasti samozapošljavanja u "Fond za pomoć poplavljenim područjima". Umjesto toga, vijećnici su zadužili Opštinski štab civilne zaštite da donese odluku o izdvajanju 100.000 KM iz sredstava Civilne zaštite, a na ime pomoći poplavljenim područjima u BiH. Također, Vijeće je ovlastilo Kolegij Općinskog vijeća da izvrši raspodjelu datih sredstava po prijedlozima Klubova vijećnika kada spisak prijedloga bude konačan.



Bistrički potok (16. maj, 2014. godne)



Bursa uputila osam šlepera pomoći



Paketi pomoći za stanovnike Olova

Nesebična pomoć pobratimskih gradova i općina

Turski grad Bursa, predvođen gradonačelnikom Redžepom Altepe, koji gaji izuzetno dobre prijateljske odnose sa Općinom Stari Grad uputio je dva šlepera pomoći za stanovništvo stradalo u poplavama i klizištima koji su zahvatili našu zemlju. U dogovoru sa Općinom Stari Grad i načelnikom Hadžibajrićem, Bursa je ugroženima uputila stvari neophodne za normalizaciju života i novi smještaj. Ugroženim građanima u Vogošći, Olovu i Zavidovićima isporučeno je 160 kauča, 100 madraca i 1000 deka. Nedugo nakon toga iz Burse su stigla još dva šlepera pomoći u Olovo koji su ovaj put dovezli dezinfekcijska sredstva, odjeću, obuću, madrace, ćilime, pumpe i drugo. Bursa je u maju uputila četiri šlepera pomoći i u Maglaj.

Građani općine Karamursel iz Republike Turske koju sa Općinom Stari Grad od 2006. godine veže Sporazum o bratimljenju, prikupili su finansijsku pomoć. Djeci bez roditelja koja žive u poplavljenim područjima, ili su ugroženi klizištima, prijatelji iz Karamursela su donirali 4.000 eura. Putem Općine Stari Grad, donirali su još 1.000 eura za nabavku goriva za mašine kojima su čišćene ulice Maglaja.

Općine Umranije i Kaghitane, koje su u članstvu "Unije općina Mramornog mora", prikupile su pet kontejnera pomoći za Maglaj, koje su im isporučili 08. juna.

Općinsko vijeće

16. sjednica

Općinskog vijeća

Nacrtr poslovnika Općinskog vijeća Stari Grad Sarajevo, vijećnici su na sjednici koja je održana 31. marta, potvrdili i uputili ga u javnu raspravu. Većinom glasova usvojen je rebalans budžeta Općine Stari Grad nakon što je načelnik prihvatio amandman Naše stranke kojima se ostvaruju uštede od oko 100.000 KM. "Naša stranka je pokrenula i inicijativu da se upravo iz tih sredstava formira vlastito privredno društvo za turizam i lokalno poslovanje, što je načelnik i prihvatio", sopoćeno je iz Vijeća.

Usvojen je i Izvještaj o realizaciji budžeta Općine za period 01. januar, 2013. - 31. decembar, 2013. godine i Prijedlog odluke o usvajanju finansijskih izvještaja, završnog računa Općine za 2013. godinu.

Prijedlog odluke o davanju predhodne saglasnosti za kreditno zaduženje za realizaciju kapitalnog projekta Općine Stari Grad Sarajevo nije usvojen, jer nije dobio dvotrećinsku većinu koja je u ovom slučaju neophodna.

Potvrđen je i Nacrtr odluke o izmjeni Odluke o naknadama i drugim pravima općinskih vijećnika i članova radnih tijela Općinskog vijeća Stari Grad Sarajevo, kao i Nacrtr odluke o izmjenama i dopunama Odluke o utvrđivanju platnih razreda i koeficijenata za plaće i naknade nosilaca funkcija i savjetnika, državnih službenika i namještenika Općine. Usvojen je i prijedlog Odluke o izmjeni i dopuni Odluke o učešću u finansiranju rada klubova vijećnika političkih stranaka i nezavisnih vijećnika u Općinskom vijeću Stari Grad Sarajevo.

Na prijedlog klubova vijećnika SDA i SDP, utvrđen je i Nacrtr odluke o dodjeli u zakup poslovnih zgrada i poslovnih prostora.

Jednoglasno su usvojeni prijedlozi odluka povodom obilježavanja Dana Općine, te Zaključak o izdvajanju sredstava namijenjenih za obilježavanje Dana Općine.

Vijećnici su prihvatili informacije o protokolu o saradnji na realizaciji projekta poploćavanja Baščaršijskog trga, te o prodaji poslovnih prostora zakupcima i prodaji stanova.

Vijećnici su jednoglasno donijeli odluku i izdvojili 10.000 KM za rad Koalicije "Prvi mart". Razmatrana je i inicijativa Udruženja "Obrazovanje gradi BiH" da se jedna ulica u Starom Gradu nazove po Pavi Jusufu Urbanu. Međutim, nakon rasprave zaključeno je da jedan od dva neimenovana mosta na Starom Gradu dobije njegovo ime.



Usvojen rebalans Budžeta

17. sjednica

Općinskog vijeća

Na 17. sjednici Općinskog vijeća Stari Grad koja je održana 24. aprila, usvojena je Odluka o dodjeli u zakup poslovnih zgrada i poslovnih prostora kojom se zakupcima smanjuju kirije.

Usvojeni su i prijedlozi odluka o dodjeli priznanja Općine Stari Grad Sarajevo, o visini naknade za pogodnosti gradskog građevinskog zemljišta - rente za područje Općine Stari Grad Sarajevo za 2014. godinu, te o utvrđivanju visine naknade za građevinsko, poljoprivredno i gradsko građevinsko zemljište za 2014. godinu.

Vijećnici su informisani o realizaciji Budžeta Općine Stari Grad Sarajevo za period od 01. januara, 2014. do 31. marta, 2014. godine, te o Programu obilježavanja



Ahmed Mašić, vijećnik

"Dana Općine Stari Grad Sarajevo 2014".

Na 17. sjednici vijećnik Ahmed Mašić istupio je iz kluba vijećnika Stranke za Bosnu i Hercegovinu i najavio da će ubuduće nastupati kao samostalni vijećnik.

Usvojen je i Prijedlog Strategije lokalnog razvoja Općine Stari Grad Sarajevo 2014/2018. godine.

18. sjednica

Općinskog vijeća

Stavljanjem van snage Zaključak Općinskog vijeća broj: 02-49-207/14 i donošenjem novog zaključka, Općinsko vijeće Stari Grad je na 18. sjednici održanoj 29. maja, odlučilo da se grant od 100.000 KM namijenjenih za realizaciju i sufinansiranje projekata iz oblasti samozapošljavanja, preusmjere u grant koji će se zvati "Fond za pomoć poplavljenim područjima". Bio je to prijedlog Kluba vijećnika Naše stranke koji su vijećnici jednoglasno podržali.

Vijeće je na sjednici donijelo i Odluku o nabavci putničkog motornog vozila za potrebe Općine Stari Grad, u vrijednosti do 25.000 KM (sa uračunatim PDV-om), a sredstva će se obezbijediti jednim dijelom od naplate štete za otuđeno vozilo Službe općinskog vijeća (16.500 KM), dok će drugi dio sredstava biti osiguran općinskim budžetom. Prethodno je usvojen zaključak da Općinski načelnik stavi na raspolaganje Službi općinskog vijeća jedno vozilo koje koristi Kabinet, s obzirom da Služba vijeća ne raspolaže trenutno nijednim vozilom. Vozilo marke passat, kojim je raspolagala Služba općinskog vijeća, otuđeno je predsjedavajućem Vedranu Dodiku od strane nepoznatog lica, u decembru prošle godine.

Općinsko vijeće je verifikovalo i mandat samostalnom vijećniku Ahmedu Mašiću koji je istupio iz Stranke za BiH, te usvojilo pri-

jedlog rješenja o razrješenju člana Komisije za pitanja penzionera i penzionerskog standarda Envera Vatreša, te imenovanju novog člana Sanele Džinović.

Usvojen je i prijedlog Odluke o objavljivanju Javnih nabavki (svih obavještenja o javnim nabavkama, poništenja, dodjeli ugovora i sl) na web stranici www.starigrad.ba.

Predsjedavajući Općinskog vijeća Vedran Dodik je najavio da će (29. maja) biti potpisana i Odluka o dodjeli u zakup poslovnih zgrada i poslovnih prostora Općine Stari Grad Sarajevo, te upućena na objavu u Službene novine.



100.000 KM pomoći za poplavljene

Nastavljena izgradnja zgrade na Baruthani

Nastavljeni su radovi na izgradnji objekta kolektivnog stanovanja na Baruthani koji su bili obustavljeni prošle godine zbog neispunjavanja obaveza od strane Ministarstva za rad, socijalnu politiku, raseljena lica i izbjeglice Kantona Sarajevo.

U februaru ove godine, Općina Stari Grad i humanitarna organizacija Hilfswerk Austria International za BiH, potpisali su ANEKS 3 Generalnog sporazuma o realizaciji projekta izgradnje objekta kolektivnog stanovanja na Baruthani, čime je Općina osigurala dodatnih 100.000 KM za nastavak radova.

Radove na izgradnji ovog objekta izvodi firma "Unigradnja", a nakon izgradnje potpornih zidova i trotoara, počelo je postavljanje fasade i izgradnja fasadnih otvora.

Ova faza projekta podrazumijevat će

građevinsko zanatske radove koji obuhvataju fasadnu stolariju, termo-fasadu, gromobransku instalaciju, vertikalne oluke i dio vanjskog uređenja (potporni zid, vanjsko stepenište i trotoar oko objekta).

U novoj zgradi bit će smješteno 11 interno raseljenih porodica s područja Općine Stari Grad, koje su od okončanja posljednjeg rata u BiH izbjeglice u svom gradu.



U toku postavljanje fasade

Sanacija Saburine kuće – II faza



Restauracija unutrašnjosti objekta

Druga faza sanacije i restauracije objekta Saburina kuća počela je 26. maja, 2014. godine. Radove izvodi firma Neimari d.o.o, a trebali bi biti završeni do kraja jula.

Početkom maja potpisan je Ugovor o izvođenju II faze radova sanacije i restauracije objekta Saburina kuća čime će biti završena sanacija ovog nacionalnog spomenika, odnosno same kuće.

Ugovor su potpisali Općina Stari Grad Sarajevo, Zavod za zaštitu kulturno-historijskog i prirodnog naslijeđa KS i firma Neimari d.o.o.

Druga faza radova, između ostalog,

podrazumijeva konzervaciju i restauraciju drvenih elemenata musandere i dekorativnih šišeta, restauraciju slikane dekoracije koja obuhvata i restauraciju originalnih slikarija uz prozore. U prizemlju i na spratu će biti obnovljene tradicionalne peći s lončićima. Pored navedenih konzervatorsko-restauratorskih radova, druga faza obuhvata i izvođenje instalaterskih radova i to: gromobranske instalacije, instalacije vodovoda i kanalizacije, te instalacije grijanja. Također, izvršit će se i postavljanje rasvjetnih tijela. Općina Stari Grad je za ove radove izdvojila 71.901,82 KM.

Kuća budućnosti u Starom Gradu



Sa polaganja kamena temeljca: Hadžibajrić i Čolak

Kamen-temeljac za izgradnju prve pasivne kuće u Bosni i Hercegovini, koja se gradi na Kovačima, a prema trendu koji prate zemlje Evropske unije, položili su 07. maja, 2014. godine načelnik Ibrahim Hadžibajrić i direktor firme "Promo"d.o.o. Kemal Čolak. Nedugo nakon toga počela je gradnja takozvane "kuće budućnosti" koja će svojom vrhunskom toplotnom izolacijom i korištenjem energije iz obnovljivih izvora znatno smanjiti potrošnju energije.

Projekat realizuju Općina Stari Grad, koja je ustupila lokaciju, te izdala potrebne dozvole i firma Promo d.o.o. koja je do sada izgradila niz niskoenergetskih objekata u mnogim zemljama Evrope.

Ugodna temperatura cijele godine



U toku postavljanje izolacije

Objašnjavajući prednosti ovakve gradnje, Tarik Poturović, šef Sektora za lokalni razvoj je ranije izjavio: "Pasivna kuća je niskoenergetski objekat koji osobinama ugrađenog materijala i načinom izbora grijanja i hlađenja pruža ugodan unutrašnji prostor i udoban boravak tokom cijele godine - zimi je prosječna temperatura 20 stepeni, a ljeti 26 stepeni - uz vrlo malu potrošnju energije."

Ukupna površina kuće koja se gradi u ulici Nadmlini, mjesna zajednica Kovači, iznosit će oko 103 kvadrata. Radovi na izgradnji će biti završeni do kraja ove godine.

Promocije

Virtualni vodiči u Starom Gradu


Skeniranjem kodova na naljepnicama počinje putovanje kroz historiju...Projekat urađen na pet jezika...Brošure sa uputstvom za korištenje aplikacije

Općina Stari Grad Sarajevo prva je općina u Evropi koja je implementirala aplikacije uvećane realnosti za prezentaciju turističkih znamenitosti. Projekat nazvan "Virtualni vodič" pruža najkvalitetniju, ali i najmoderniju prezentaciju historije i kulture najstarije gradske općine. Do sada je projekat u potpunosti implementiran u Kuala Lumpuru u Maleziji, a Stari Grad Sarajevo je evropska premijera za ovu tehnologiju. Nakon Starog Grada na redu su drugi veliki centri među kojima je i Istanbul. Razvoj aplikacije i implementacija projekta je djelo firme AD Consulting doo Sarajevo, na čelu sa Muhamedom Ljevakovićem. Aplikacija je dio Yesari porodice proizvoda koja predstavlja inovativna evolucionarna tehnološka rješenja za unapređenje kvaliteta života, a s ovom implementacijom se olakšava pristup informacijama brojnim sarajevskim turistima.

"Virtualni vodič" mogu koristiti svi korisnici smart, ili tzv. pametnih telefona, preuzimanjem aplikacije kojom pristupaju audio i video sadržajima koji će ih upoznati sa historijom objekta, znamenitosti ili mjes-



Historija Sebilja putem aplikacije



Naljepnica za Bakr-babinu džamiju i arheološki park "At mejdan"

ta gdje se nalaze. Ovi zapisi urađeni su na osnovu starih fotografija ili snimaka koji datiraju još iz osmanskog i austro-ugarskog perioda. Svi sadržaji su dostupni na: bosanskom jeziku, engleskom, njemačkom, turskom i arapskom, s obzirom da je najveći broj turista koji dolaze u Stari Grad upravo sa ovih govornih područja.

Na ukupno 21. lokaciji ili objektu postavljene su naljepnice sa QR kodovima koje je potrebno skenirati kako bi se pristupilo sadržajima. Po preuzimanju koda, počinje putovanje kroz historiju i upoznavanje sa vremenom nastanka znamenitosti ispred koje se korisnik nalazi, njenim osnivačem/graditeljem, historijskim periodima, rušenjima i restauracijama kroz koje je prolazila, pa do današnjih dana. Sve naljepnice su specijalno dizajnirane za objekat na koji su postavljene, a izrađene su od samoljepljive bijele folije koja je otporna na vodu.

Osim na objektima, kodovi se mogu preuzeti i na panou koji će od 09. augusta biti postavljen na Međunarodnom aerodromu Sarajevo, kao i na panou u Info-press cen-

tru u Halačima. Aplikaciju korisnici mogu preuzeti i na bilo kojem drugom mjestu sa mogućnošću pristupa internetu, i to na <http://strarigrad.yesari.biz>. Također, štampane su brošure sa uputstvom za korištenje aplikacije koje se mogu preuzeti širom Starog Grada: u Info-press centru, Centru za doček posjetitelja, Turističkom info-punktu, općinskom Info-pultu, ugostiteljskim objektima...Preuzimanje aplikacije je besplatno.

Pri izboru znamenitosti i lokacija koji su obuhvaćeni projektom najviše se vodilo računa o njihovoj atraktivnosti za turiste, odnosno izabrani su oni za koje se smatra da ih turisti najčešće posjećuju kada dođu u Stari Grad. S obzirom da ova općina ima mnogo više kulturno-historijskih spomenika i lokacija koje treba posjetiti, projekat "Virtualni vodič" ostavlja mogućnost povećanja broja sadržaja.

Autor svih tekstova obrađenih u projektu je arhitekta Mufid Garibija, izuzetni poznavalac historije Sarajeva, a uz sugestije i prijedloge vlasnika i upravitelja objekata koji su obrađeni.

Znamenitosti obrađene u "Virtualnom vodiču"

1. Mjesto atentata na Franca Ferdinanda
2. Vijećnica
3. Gazi Husrev-begova džamija
4. Stara pravoslavna crkva
5. Katedrala
6. Stari jevrejski hram
7. Sebilj
8. Svrzina kuća
9. Morića han
10. Kolobara han
11. Žuta tabija
12. Bijela tabija
13. Gazi Husrev-begov hamam i Bošnjački institut
14. Bakr-babina džamija i arheološki park At mejdan
15. Muzički paviljon At mejdan
16. Gazi Husrev-begov bezistan
17. Sahat kula
18. Mevlevijska tekija (Balkanski mevlevijsko-istraživački centar na Kovačima)
19. Careva džamija
20. Bezistan i Tašlihan
21. Inat kuća

Za NVO 79.000 KM

Potpisivanjem ugovora između Općine Stari Grad i nevladinih/neprofitnih organizacija o finansiranju i sufinansiranju njihovih projekata okončan je proces izbora projekata koji će biti implementirani na području Starog Grada u toku 2014. godine.

Ceremoniji potpisivanja ugovora prisustvovali su načelnik Ibrahim Hadžibajrić, pomoćnica načelnika za obrazovanje, kulturu, sport i lokalni razvoj Amina Deljković, te predstavnici nevladinih organizacija čiji su projekti odabrani.

Ove godine iz budžeta Općine Stari Grad bit će finansirano 10 projekata nevladinih organizacija iz oblasti obrazovanja, socijalne zaštite, zdravstva, turizma i mladih, a na osnovu Odluke o raspodjeli sredstava za projekte nevladinih organizacija dodijeljeno 79.427,90 KM.

Debate i kultura dijaloga

Općina će sa 8.000 KM finansirati i projekat Centra za kulturu dijaloga. Sanja Vlasisavljević, direktorica Centra za kulturu dijaloga, istakla je kako je zahvalna na pomoći koju su dobili od Općine. "Najvažnije je da se Općina vodila kriterijima kvaliteta, jer nažalost nevladin sektor se enormno širi i mislim da više ne služi svojoj svrsi", istakla je Vlasisavljević, te dodala da Centar za kulturu dijaloga ne odstupa od svoje tradicije, a to su debate i kulture dijaloga i preko ovog projekta će analizirati stanje 18 godina poslije rata kako to izgleda u BiH.

Na Javni poziv koji je bio raspisan 5. marta, 2014. godine i ostao otvoren do 26. marta, 2014. godine, prispjelo je ukupno 65 projektnih prijedloga. Komisija za

ocjenjivanje i odabir projekata izabrala je 10 projekata.

Izabrano 10 najboljih projekata

Projekti koji će biti finansirani sa ukupno 79.427,90 KM su:

NVO Altruista "Svjetlo" - "Koraci znanja putevi socijalne isključenosti"; Udruženje Konjički klub "Djeca vjetra Sarajevo" - "Jahanjem do zdravog načina života i jačanje sportskog duha"; Karate klub "Satori" - "Razvoj i obuka mla-



Sa potpisivanja ugovora

dih u karate sportu"; Plivački klub "Stari Grad" - "Opština Stari Grad bez ijednog neplivača"; Udruženje za internet promociju biznisa i turizma "e-Mreža" - "Zanatsko-turistički web portal www.bascarsija.info"; KUD "Šadrvan" - "Buđenje svijesti kod učenika o značaju očuvanja sevdalinke"; Fondacija lokalne demokratije Sarajevo - "Resocijalizacija žrtava nasilja u porodici"; KUD "Bašćaršija" - "Tradicija-potreba i inspiracija"; Fondacija Sarajevo Navigator - "Razvoj kulturnih i turističkih potencijala Općine Stari Grad"; Centar za kulturu dijaloga - "Debate i kultura dijaloga u BiH - 18 godina poslije rata".

Evropska unija odobrila projekat Općine

Ibrahim Hadžibajrić, načelnik Općine Stari Grad, potpisao je ugovor vrijedan oko 260.000 eura sa Evropskom unijom za realizaciju projekta „PHOENIX – Kultura za budućnost“.

Ovaj projekat, kojim je Općina Stari Grad aplicirala prema Evropskoj uniji, je jedan od ukupno pet odobrenih projekata u sklopu programa "Sarajevo 2014."

Za program „Sarajevo 2014.“, čiji je cilj doprinos obilježavanju 2014. kao godine sjećanja u BiH, prenoseći evropske vrijednosti pomirenja, različitosti i opredijeljenosti zajedničkom suočavanju sa izazovima,

Evropska komisija je obezbijedila ukupno dva miliona eura.

Projekat „PHOENIX – Kultura za budućnost“ bit će implementiran u narednih 18 mjeseci i zajedno će ga realizovati Općina Stari Grad i njeni partneri Zona unaprijeđenog poslovanja Bašćaršija i Fondacija Sarajevo navigator. Ukupna vrijednost projekta je oko 260.000 eura. Evropska unija za njegovu realizaciju je osigurala oko 220.000 eura, dok će ostatak novca obezbijediti Općina Stari Grad, Zona unaprijeđenog poslovanja Bašćaršija i Fondacija Sarajevo navigator.

Dodijeljeno 15 plastenika u Starom Gradu



Dobitnici plastenika

Općina Stari Grad donirala je 15 plastenika domaćinstvima koja se bave poljoprivrednom proizvodnjom.

Projekat plasteničke proizvodnje počeo je još davne 2003. godine, tako da su do sada dodijeljena 104 plastenika, od čega 50% u posljednjih pet godina.

Načelnik Hadžibajrić je podsjetio kako Općina svake godine donira plastenike građanima u starogradskim naseljima, a sve u cilju razvoja i stimulisanja plasteničke proizvodnje.

„Općina Stari Grad dodjelom ovih plastenika ne podstiče samo poljoprivrednu proizvodnju, nego i pruža pomoć porodicama i demobilisanim borcima koji su nezaposleni. Za ove ljude ovo je dodatni izvor prihoda i nadamo se da će na ovaj način popraviti svoj kućni budžet.“, kazao je Hadžibajrić, te najavio kako će Općina i u narednom periodu izdvajati sredstva za ove namjene.

Pomoćnik načelnika Alija Kamber je naglasio kako je u ovogodišnjem budžetu za nabavku i montažu 15 plastenika obezbijedeno 35.700 KM, a 12.000 KM za nabavku sadnog materijala kao što su paradajz, paprika i dr.



Za plastenike obezbijedeno 35.700 KM

Istakao je kako je podsticaj poljoprivredi jedan od strateških ciljeva razvoja Općine Stari Grad. "Općina je svojim sugrađanima do sada dodijelila 104 plastenika, od čega 52 plastenika od 2010. godine do danas. Prednost pri odabiru korisnika i ove godine kao i prethodnih imali su nezaposleni demobilisani borci i penzioneri", rekao je Kamber.

Manifestacije

25. april – 10. maj, 2014. godine

DANI OPĆINE STARI GRAD

Program "Dani Općine Stari Grad Sarajevo" kojim se obilježava 02. maj, Dan Općine, trajao je od 25. aprila do 10. maja kulturne, sportske i zabavne sadržaje, kao i one posvećene boračkoj populaciji.

Fatiha velikanima Sarajeva

Učenjem Fatihe Isa-begu Ishakoviću, Gazi Husrev-begu i šehidima na Šehidskom mezarju Kovači predstavnici Općine Stari Grad su obilježili 2. maj, Dan Općine Stari Grad.

Predstavnici izvršne i zakonodavne vlasti Općine Stari Grad posjetili su mezar osnivača Sarajeva Isa-bega Ishakovića u Carevoj džamiji, turbe najvećeg sarajevskog vakifa Gazi Husrev-bega u Begovoj džamiji i Šehidsko mezarje Kovači gdje su odali počast šehidima koji su živote dali za odbranu BiH tokom agresije na našu zemlju od 1992. do 1995. godine.

Hatma-dova u amfiteatru Memorijalnog centra "Kovači"

U Multimedijalnoj sali/amfiteatru Memorijalnog centra "Kovači", 25. aprila proučena je hatma-dova šehidima Bosne i Hercegovine.

Načelnik Ibrahim Hadžibajrić kazao je kako se već tradicionalno u sklopu obilježavanja Dana Općine Stari Grad na ovom mjestu uči hatma dova šehidima. "Žao mi je što nas nema puno više, jer ne smijemo zaboraviti agresiju na naš Grad 92/96.", riječi su Hadžibajrića. U ime Fonda memorijala obratio se pomoćnik direktora Suad Zijadić koji se zahvalio prisutnima na dolasku, te istakao kako je sramotno što je mali broj ljudi došao na učenje hatma-dove. Hatma-dovu proučila su četiri imama iz Islamske zajednice.

Dodijeljeni certifikati "Original Sarajevo Quality"

Načelnik Hadžibajrić i Dejvid Barth, direktor misije USAID-a u BiH, uručili su 28. aprila sarajevskim zanatlijama certifikate i zaštićene pečate u Bošnjackom institutu.



Hadžibajrić i Barth sa certificiranim zanatlijama

"Ono što pripada tradiciji Baščaršije i njenim građanima prvi put je zaštićeno i vraćeno zanatlijama koji su ostali dosljedni tradicionalnom načinu rada sarajevskog filigrana, papuča, savata, boze, salepa, te zlatarstva", kazao je tom prilikom Hadžibajrić. On je pojasnio da će pomoću oznaka koje će biti izložene na vidno mjesto na zanatskim radnjama građani i turisti jasno moći razlikovati tradicionalne autentične rukotvorine od uvezenih proizvoda iz inozemstva.

Certifikat o autentičnosti geografskog porijekla dobilo je 18 nominacijskih fajlova (zanatlija) koji su predati na certifikaciju Institutu za intelektualno vlasništvo Bosne i Hercegovine.

Cjelokupnu aktivnost certificiranja

su inicirali i podržali ZUP Baščaršija, USAID-Sida FIRMA projekat, te same zanatlije, dok je implementator aktivnosti bila agencija BE Konsalting iz Sarajeva.

Institut za zaštitu intelektualnog vlasništva BiH po prvi put je u Sarajevu proveo ovakav proces certifikacije. Proces je uključivao i izradu pravilnika, te pripremu mape puta. Time su, uz potvrdu autentičnosti prve grupe zanata i zanatlija, stvoreni uslovi da i dodatni zanati u nekom narednom periodu budu priznati kao autentični.

Hedije boračkoj populaciji

Predstavnici Općine Stari Grad su 02. maja ugostili 250 pripadnika boračke populacije i uručili im novčane hedije od

Certificirano 18 zanatlija

Certifikate za autentični sarajevski filigran dobili su Midhat Bećar, Muhsin Halvo, Nihad Halvo, te Mensur Bektić. Vrsni majstor Ahmed Kalajdzisalihović jedini je zaštitnik papudžijskog zanata, dok su Muhamed Huseinović, Nermina Alić i Edin Kazaz kazandžijski.

Certifikati su uručeni i sarajevskim zlatarima Mensuru Zlataru, Muhamedu Ferušiću, Nermini Begović, Fahrudinu Sofiću, Fuadu Kasumagiću te Senadu i Seadu Softiću.

Certificirani su i bozadžija Dženan Nezirović za autentičnu osvježavajuću sarajevsku bozu, te Snježana Nezirović za sarajevski salep.

AD SARAJEVO

aja, 2014. godine. I ove godine program je bio sadržajan i donio je brojne



po 100 KM. Druženje je organizovano za 100 članova šehidskih i porodica poginulih boraca, 100 nezaposlenih ratnih vojnih invalida i 50 nezaposlenih demobilisanih boraca.

Ovo druženje postala je tradicionalna aktivnost koju svake godine, povodom Dana Općine, organizuju predstavnici izvršne i zakonodavne vlasti Općine Stari Grad. Pripadnike boračkih populacija ugostili su Ibrahim Hadžibajrić, načelnik Općine Stari Grad Sarajevo, Nermin Bjelak, zamjenik predsjedavajućeg Općinskog vijeća Stari Grad i Sakib Avdibegović, pomoćnik općinskog načelnika za boračko-invalidsku zaštitu.



Sa dodjele hedija

Izložba "Prijateljstva" za godišnjicu Mevlevijske tekije i Dan Općine

Načelnici Ibrahim Hadžibajrić i Ibrahim Ugur Altay otvorili su 05. maja, izložbu "Prijateljstva" u Balkanskom mevlevijskom istraživačkom centru (Mevlevijska tekija na Kovačima) čime je obilježena godina od njenog otvaranja i 02. maj, Dan Općine.

Podsjetivši da priča oko otvaranja tekije traje već tri godine, od prvog susreta sa načelnikom Hadžibajrićem, Altay je rekao da je zahvalan što je upravo Općina Seldžuk dobila priliku da sagradi tekiju, a izložba je poklon i doprinos u obilježavanju Dana Općine.

Izložba "Prijateljstva" je objedinila veliki broj radova polaznika kurseva koji se održavaju u Kulturno-edukacionom

centru Konya, kao što su slike na platnu, keramici, porcelanu, svili, drvetu, te tehnika slikanja na vodi-ebru.

Načelnik Hadžibajrić je želio naglasiti izreku da Allah daje nafaku, ali i da uvijek postoji ruka preko koje ta nafaka dođe, a u ovom slučaju je to Općina Seldžuk kojoj se još jednom zahvalio na gradnji tekije.

Posjeta Memorijalnoj galeriji 11/07/95

Delegacije pobratimskih općina Siliври, Umranije, Osmangazi, Bursa i Budva, predvođeni domaćinima iz Općine Stari Grad posjetili su 05. maja, Memorijalnu galeriju 11/07/95. Domaćini galerije upoznali su goste sa historijskim detaljima iz ratne prošlosti naše zemlje, te historijom Srebrenice od 1992-1995. godine i genocida u kojem je stradalo više od 8.000 ljudi. Prisutnima je prikazan i dokumentarni film o stradanjima Srebrenice.

Starogradski učenici u Tunelu spasa Dobrinja-Butmir

Učenici devetih razreda osnovnih škola iz Starog Grada posjetili su 06. maja, Tunel spasa Dobrinja - Butmir. Općina je uz saglasnost roditelja, direktora i nastavnika škola, odlučila na ovaj način pružiti učenicima saznanja o prošlosti Sarajeva. U sklopu posjete učenici su pogledali i kratki dokumentarni film "Tunel – Tajna opsade Sarajeva", a Općina Stari Grad im je obezbijedila prijevoz. Oko 330 učenika obuhvaćeno je ovom posjetom, a sa njima su Tunel posjetili i predstavnici Službe za obrazovanje, kulturu, sport i lokalni razvoj Općine.

"Kuća budućnosti" koja štedi energiju

Na Kovačima, u ulici Nadmlini,

načelnik Općine Stari Grad Ibrahim Hadžibajrić zajedno s direktorom firme "Promo"d.o.o. Kemalom Čolakom 07. maja je položio kamen temeljac za izgradnju prve pasivne kuće u u Kantonu Sarajevo. Čolak je ovom prilikom kazao da je ovo prva pasivna kuća koju firma poklanja građanima Općine Stari Grad, grada Sarajeva i KS. Opširnije na strani 7.

Osnovci se družili sa selektorom Sušićem

U okviru obilježavanja Dana Općine starogradski osnovci družili su se 08. maja sa selektorom nogometne reprezentacije BiH Safetom Sušićem, te simbolično ispratili reprezentaciju na svjetsko prvenstvo u Brazilu.



Druženje sa selektorom Sušićem

Učenici likovnih sekcija osnovnih škola sa područja Starog Grada uradili su radove o temi "Brazil 2014" i predstavili ih selektoru.

Sušić je starogradskim školama poklonio lopte sa svojim i potpisima igrača bh. reprezentacije.

"Zahvalio bih na podršci koju nam svi daju od kada smo se kvalifikovali u Brazil. Nadam se da će nakon prvenstva biti sretni i zadovoljni, ubijeđen sam da je naš tim spreman da obraduje navijače", kazao je tom prilikom Sušić. Nakon druženja sa selektorom, učenici šest starogradskih osnovnih škola, te djeca iz Zavoda "Mladen Pozajić" u prepunoj Velikoj sali su se, u okviru manifestacije "Djeca na dar Općini", predstavili bogatim kulturno-muzičkim programom.

Manifestacije



Svečana sjednica Općinskog vijeća održana u prepunoj sali

Svečana sjednica Općinskog vijeća Stari Grad

Historijski značaj 02. maja, 1992. godine, dana kada se pisala sudbina našeg grada i odredila njegova budućnost, obilježen je 05. maja, održavanjem Svečane sjednice Općinskog vijeća Stari Grad.

Sjednicu je otvorio predsjedavajući

Općinskog vijeća Vedran Dodik koji je na početku prisutne pozvao da se učenjem Fatihe ili minutom šutnje prisjete svih koji su izgubili živote i nisu više s nama. Predsjedavajući se u svom govoru zahvalio i brojnim zvanicama koji su svojim prisustvom uveličali sjednicu, među njima i delegacijama pobratimskih općina: Osmangazi, Seldžuk, Umranije, Silivri, te Bursa iz Republike Turske, Budva, Karpoš, Kruja, Bosanska Krupa...

Nakon predsjedavajućeg prisutne je pozdravio načelnik Ibrahim Hadžibajrić podsjetivši da je Općina Stari Grad jedna od najstarijih u BiH u doba modernih uređenja države gdje se susreću različite vjere, kulture i tradicije što je jedinstven slučaj, a pogotovo u vrijeme velike krize morala, koja nije samo slučaj vezan za našu općinu, državu, nego je to karakteristika globalnog otuđenja jednih od drugih.

Uručena priznananja i povelje

Uz bogat kulturno-zabavni program najzaslužnijim pojedincima uručena su općinska priznanja i povelje. Općinsku povelju sa zlatnim štitom dobio je Suad Pecar, borac za BiH i jedna od značajnijih ličnosti u ratnom periodu na prostoru MZ Širokača, ali i šire.

Općinska povelja sa zlatnim štitom pripala je i Muhamedu Grebi, nosiocu najvišeg ratnog priznanja Zlatni ljiljan. Ove godine priznanje Zlatni sebilj dobili su veliki prijatelji Općine Stari Grad Sarajevo: načelnici pobratimskih općina Osmangazi i Seldžuk: Mustafa Dindar i Ibrahim Ugur Altay. Dindar je zaslužan za pružanje ekonomske pomoći pri realizaciji projekata u Općini Stari Grad, kao što su izgradnja Bakr-babine džamije, informacionog sistema na Kovačima, te izdvajanju sredstava za rekonstrukciju Bašćaršijskog trga čija će realizacija početi u oktobru ove godine.

Altay se smatra zaslužnim za jačanje ove dvije lokalne zajednice i njihovo međusobno povezivanje što se najbolje ogleda kroz projekte kao što je izgradnja Mevlevijske tekije na Kovačima.

Policajac godine je, za brojna dostignuća, a naročito za zalaganje u vrijeme spašavanja Adisa Bostandžije iz nabujale rijeke Miljacke, Dževad Sofović.

Otvorena Narodna kuhinja "Hasene" na Bašćaršiji

U okviru obilježavanja Dana Općine Stari Grad, 09. maja, je svečano otvorena Narodna kuhinja "Hasene" na Bašćaršiji.

Narodnu kuhinju svečano su otvorili načelnik Općine Stari Grad Ibrahim Hadžibajrić, predsjednik Udruženja za pomoć i socijalnu podršku "Hasene" Mesut Gulbahar, te predsjednik Udruženja "Balkanski narodni pogled" Edin Salković.

Hadžibajrić je kazao da ovaj objekt ne samo što je uljepšao ovaj dio Staroga Grada nego će biti i društveno koristan.

"Kuhinja će zvanično svoja vrata za socijalno ugrožene porodice otvoriti prvoga dana Ramazana i vodit će je Balkanski narodni pogled", kazao je

500 dnevnih obroka

Kapacitet kuhinje će biti oko 500 dnevnih obroka za starije i iznemogle tj. za najugroženiju populaciju stanovništva, a planirana je i dostava za sve one koji nisu u mogućnosti da dođu sami po hranu. Narodna kuhinja "Hasene" nalazi se na Bašćaršiji u ulici Safvet-bega Bašagića broj 38.

Hadžibajrić.

Dodao je da je objekat privatno vlasništvo „Hasene“, a Općina je pomogla u prikupljanju dokumentacije za gradnju i odobrenju arhitektonskog projekta.

Arhitekta Edin Šehbajraktarević ukomponirao je kvalitetu okoline, kulturu, imidž i identitet Starog Grada, te novootvoreni objekt ne odudara od tradicijske gradnje.

“Narodna kuhinja će biti na usluzi svim sugrađanima Sarajeva i BiH bez obzira na to kojoj vjeri i naciji pripadaju”, kazao je Edin Salković, predsjednik Udruženja “Balkanski narodni pogled” i dodao da je u izgradnju objekta uloženo oko milion KM.



Narodna kuhinja "Hasene" na Bašćaršiji

Ekipa iz Sofije pobjednica goalball turnira

Ekipa Vitoš iz Sofije osvojila je prvo mjesto na 7. Međunarodnom goalball turniru slijepih i slabovidnih osoba, drugo mjesto pripalo je ekipi iz Zagreba, a treće Banja Luci. Na četvrtom mjestu bila je ekipa Sportskog društva slijepih Kantona Sarajevo, na petom Zavod za slijepu djecu i omladinu Nedžarići, dok je na šestom mjestu bilo Sportsko društvo slijepih Varna iz Bugarske.

Načelnik Ibrahim Hadžibajrić prilikom otvaranja turnira kazao je kako mu je veliko zadovoljstvo što se turnir održava u sklopu obilježavanja Dana



Održan 7. goalball turnir

Općine. Svim takmičarima uručene su medalje, pehari i diplome.

Sedmi međunarodni goalball turnir slijepih i slabovidnih osoba, povodom obilježavanja Dana Općine Stari Grad Sarajevo, organizovao je Sportski savez slijepih i slabovidnih osoba Kantona Sarajevo, pod pokroviteljstvom Općine. Turnir je održan 10. maja, 2014. godine u Prvoj bošnjačkoj gimnaziji.

Karate turnir "Stari Grad open 2014"

Tradicionalni karate turnir "Stari Grad open 2014" održan je 27. aprila, 2014. godine u Kulturno-sportskom centru Vogošća. Dvanaesti po redu turnir organizovao je Sarajevski karate klub "Stari Grad" povodom obilježavanja Dana Općine.

Na XII Memorijalnom karate turniru „Stari Grad open 2014“ učestvovala su 22 kluba sa ukupno 270 takmičara. Takmičari karate kluba „Stari Grad“ osvojili su 76 medalja.

Održan IV plivački miting "Bembaša kup-Stari Grad 2014."

Na Olimpijskom bazenu Otoka 10. maja, održan je IV Plivački miting "Bembaša kup-Stari Grad 2014" na kojem je učestvovalo oko 350 plivača iz bh klubova. Kao i svake godine, miting je održan u organizaciji PK Stari Grad. Otvorio ga je načelnik Ibrahim Hadžibajrić zaželivši takmičarima dobre rezultate i lijepo druženje. PK Stari Grad, koji je u ovoj godini osvojio 200 medalja, od čega devet na državnom i 43 na kantonalnom nivou, i na ovom mitingu je zabilježio dobre rezultate. Plivači ovog kluba osvojili su četvrto mjesto i dobili najviše medalja-ukupno 23.

Najuspješniji klub bio je PK Bosna, a drugo i treće mjesto pripalo je klubovima "Orka" iz Mostara i GKV iz Sarajeva. Najuspješnija takmičarka bila je Amila Beganović, a najuspješniji takmičar u svim disciplinama Bakir Babović. Najbolji takmičari dobili su medalje, a najbolji klubovi pehare, te suvenir "Vrata Starog Grada".

Plivači iz Starog Grada nastupili su 07. juna na Humanitarnom plivačkom mitingu, na kojem su od kotizacija i prodaje sportskih rekvizita, prikupljana sredstva za pomoć poplavljenim područjima u BiH. Osim toga, članovi ovog kluba prikupili su značajne količine humanitarne pomoći, te je donirali zajedno sa trenerkama, majicama i ostalim rekvizitima svog kluba.



Na mitingu učestvovalo oko 350 plivača iz bh klubova

Saniran podzid kod Inat kuće



Zid u ulici Toplik

Radnici građevinske firme „Kli-co-trans gradnja“ iz Sarajeva, uradili su preslaganje kamenog zida u koritu Miljacke, kod Inat kuće, u ulici Toplik.

Do obrušavanja zida u koritu Miljacke, kod Inat kuće došlo je sredinom maja, usljed obilnih padavina i izuzetno visokog vodostaja Miljacke, koji je iznosio čak 244 centimetra.

Tokom sanacije se vodilo računa o autentičnosti zida, s obzirom da se nalazi na obali Miljacke, tako da je građen od istog kamena.

Projekat sanacije potpornog zida finansirala je Općina Stari Grad, a vrijednost investicije je bila oko 2.500 KM.

Popravljen oštećeni zid kod mosta Ćumurija



Saniran zid u koritu rijeke Miljacke

Prošlog mjeseca urađena je sanacija obrušenog zida na koritu rijeke Miljacke, u blizini mosta Ćumurija. Do obrušavanja zida je došlo 14. maja, usljed visokog vodostaja Miljacke.

S obzirom da je zbog ovog oštećenja obustavljen tramvajski saobraćaj na relaciji Skenderija-Baščaršija, Općina je radi hitnosti rješavanja problema angažovala firmu „Bosman“ iz Sarajeva da sanira zid.

Radovi su podrazumijevali raščišćavanje terena, nasipanje pijeskom platoa na kojem se radilo, ukopavanje betonskih stabilizatora/šipova na dubinu od dva do dva i po metra, te sanacija površinskog dijela zida.

Infrastruktura

Izgrađena dva potporna zida

Izgrađena su dva nova armirano-betonska potporna zida u predhodnom periodu, a njihovu rekonstrukciju je sa oko 80.000 KM finansirala Općina Stari Grad Sarajevo.



U ulici Save Skarića zid dug 29 metara

Ulica Save Skarića

Izgrađen je armirano-betonski potporni zid u ulici Save Skarića broj 9, čime su poboljšani uslovi života stanovnika starogradske mjesne zajednice Mjedenica.

Stari zid koji se nalazio na dijelu između kuća predstavljao je opasnost po građane i njihovu imovinu jer je bio u ruševnom i izuzetno dotrajalom stanju. Općina je stari, nagnuti zid srušila i pristupila izgradnji novog.

“Novosagrađeni potporni zid je dužine 29 metara, a na pojedinim dijelovima njegova visina doseže i 4,5 metra, jer smo tako osigurali ovaj teren i spriječili njegovu obrušavanje”, kazali su u Službi za inves-



U Ramića banji izgrađen zid dužine 26 metara

ticije, komunalne i inspeksijske poslove. Zid je koštao oko 50.000 KM, a radove je izvodila firma “Mibral”.

Ulica Ramića banja

Novi potporni zid izgrađen je i na području Mjesne zajednice Sedrenik, u ulici Ramića banja broj 40. Općina je pristupila sanaciji pomenutog lokaliteta, jer je usljed vremenskih nepogoda i jakih oborinskih i podzemnih voda dolazilo do povremenog obrušavanja. Radovi su podrazumijevali rušenje starog betonskog zida, te gradnju novog u dužini od 26 metara i visini četiri metra. Ovaj zid je koštao oko 30.000 KM, a izgradila ga je firma „Bosman d.o.o.“.

Asfaltiran put prema Hreši



Dionica puta Hreša - Biosko


Put prema dionici Hreša - Biosko je asfaltiran, čime je u potpunosti završen projekat rekonstrukcije ove saobraćajnice. Rekonstrukcija ovog puta podrazumijevala je čišćenje terena, skidanje starog asfalta, tamponiranje terena, postavljanje nasipa, kanala za odvodnju i bankina. Kompletna dionica u dužini od 300 metara je asfaltirana.

Realizacija ovog projekta rezultat je Sporazuma o sufinansiranju rekonstrukcije lokalnog puta Hreša - Biosko između općina Stari Grad i Istočni Stari Grad. Vrijednost projekta je 35.000 KM, od čega je Općina Stari Grad obezbijedila 20.000 KM, a Opština Istočni Stari Grad 15.000 KM. Izvođač radova je bila firma “Ilidža putevi”.

Sanirane četiri ulice

Tokom aprila ove godine urađena je sanacija četiri starogradske ulice. Asfaltiran je dio ulice Bostarići (od broja 19 do 29) i to u dužini od oko 150 metara, dio oštećene ulice Ramića banja u dužini od oko 100 i širini od 3 do 3,5 metra i ulica Josipa Štadlera (od ulice Edhema Mulabdića do spoja ulice Logavina) u

dužini od oko 150 i širini od 3 do 3,5 metra. Pored toga, urađeno je i proširenje donjeg dijela ulice Kovači zajedno sa kolovoznom krivinom i ulazom na plato, te prelaganje ivičnjaka. Sanacija sve četiri ulice koštala je oko 30.900 KM, a finansirala ih je Općina Stari Grad. Izvođač radova je bila firma KJKP "Rad".



Bostarići (gore lijevo), Ramića banja (gore desno), Josipa Štadlera (dole lijevo) i Kovači (dole desno)

Sanacija platoa ispred Općine

U toku je sanacija krova atomskog skloništa/platoa ispred zgrade Općine Stari Grad Sarajevo.

Iz Službe za investicije, komunalne i inspekcijske poslove Općine saopćili su da je posljednji put sanacija platoa rađena 2001. godine, te da je zbog velikih oštećenja izazvanih vanjskim uticajima bila neophodna nova sanacija da bi se spriječilo propadanje garaže i podrumskih prostorija Općine.

“Završeno je uklanjanje stare konstrukcije betona sa kompletnog platoa, te podupiranje betonske ploče skloništa. Uskoro krećemo sa postavljanjem izolacije, te instalacija za oborinsku odvodnju i rasvjetu”, pojasnili su u Službi.

Projekat sanacije platoa s oko 97.500 KM finansira Općina Stari Grad, a izvođač radova je firma “Bosman” iz Sarajeva.



U toku tamponiranje terena

Izgrađen pristupni put u ulici Iza Gaja

Izgrađen je novi pristupni put u ulici Iza Gaja - čikma broj 37, u dužini od 37 metara i prosječne širine od oko tri metra.

Radove je izvodila firma “Hise A&A”, a vrijednost investicije koju je finansirala Općina iznosila je oko 3.800 KM.

Postavljena ograda oko obdaništa na Širokači



Staro obdanište na Širokači

Postavljena je ograda oko starog obdaništa na Širokači, s ciljem sprječavanja odlaganja otpada koji neodgovorni pojedinci ostavljaju.

Savjet mjesne zajednice Širokača u više navrata uspješno je organizovao akcije čišćenje obdaništa i prostora oko njega, ali sve je bilo kratkog vijeka jer bi se nakon nekog vremena ponovo pojavila “divlja” deponija. Zbog toga je Općina odlučila da ogradi prostor i tako spriječi odlaganje kabastog i drugog otpada na ovo mjesto. Postavljena je ograda oko cijelog obdaništa visine dva i dužine oko 190 metara, a projekat je sa oko 3.400 KM finansirala Općina, dok je deratizaciju kompletnog prostora uradila firma “Cosmosol Group” iz Sarajeva, iz vlastitih sredstava.

Sportski teren Iza gaja



Asfaltiran teren

Druga faza izgradnje novog sportskog terena za mali nogomet, na lokalitetu Iza gaja, u Mjesnoj zajednici Hrid - Jarčedoli je u toku. Riječ je o nastavku projekta od prošle godine, tj. izgradnji novog igrališta za mali nogomet, po najsavremenijim standardima (20x40).

Radit će se ivičnjaci, postaviti betonski kanalići za odvodnju, asfaltirati plato i postaviti ograda oko igrališta. Za prvu fazu Općina je iz budžeta za 2013. godinu izdvojila 76.759 KM, a za nastavak projekta za drugu fazu ove godine obezbijedila je 75.000 KM. Izvođač radova je firma “Bosman” iz Sarajeva.

Prvi Sarajevo Ramazan Festival



Sa otvaranja

Prvi Sarajevo Ramazan Festival svečano je otvoren 27. juna na Žutoj tabiji, odmah nakon što je tobdžija Smajo Krivić, pucnjem iz topa s tabije označio početak ramazana, najradosnijeg mjeseca za islamske vjernike.

Festival je projekt prezentacije islamske kulture, umjetnosti i lijepih ramazanskih običaja. Sarajevo Ramazan Festival će iftarima i bogatim kulturnim sadržajem ispuniti ramazansko vrijeme.

Načelnik Općine Stari Grad Ibrahim Hadžibajrić naglasio je na otvorenju da će se ovi sadržaji dešavati u ambijentu jednog od najstarijih objekata u gradu.

Kreatori ovog projekta su Zona unaprijeđenog poslovanja Baščaršija i Fondacija Sarajevo Navigator. Cilj je upotpunjavanje turističke ponude Sarajeva. Otvorenjem prvog Sarajevo Ramazan Festivala zvanično je započela realizacija projekta "Phoenix - Kultura za budućnost" koji finansira Evropska unija, a realizuju Općina Stari Grad, Zona unaprijeđenog poslovanja Baščaršija i Fondacija Sarajevo Navigator.

Sanacija općinskih prostorija

Uporedo sa radovima na sanaciji platoa ispred zgrade Općine, traju i radovi na sanaciji općinskih prostorija. Prošle sedmice urađena je zamjena portala u prostorijama Odsjeka za inspeksijske poslove u Objektu B. Također, srušen je dio zida i proširena kancelarija, te postavljena nova vrata na ulazu sa platoa Općine. U planu je da se urade i spuštene stropovi, te postavi novi laminat. Radove je izvodila firma "Fadž company".

Osim toga, u toku su radovi na sanaciji toplovoda u objektima A i B, te podrumskim prostorijama. Ove radove izvodi firma "Techno project".

Prethodnog mjeseca izvršena je rekonstrukcija Šalter sale, odnosno premještena je kancelarija Pravne pomoći Općine Stari Grad. Na mjestu Pravne pomoći sada se nalazi Matični ured, a kancelarija Pravne pomoći je na suprotnoj strani, pored Info-pulta, a i u nju se i dalje ulazi iz Šalter sale.

Događaji



Stari Grad dobio Centar za doček posjetitelja

Na pola puta između Latinske ćuprije i Gazi Husrev-begove džamije i svega 50-ak metara od mjesta atentata na Franca Ferdinanda, otvoren je prvi Centar za doček posjetitelja u Sarajevu. Centar su 19. juna svečano otvorili načelnik Ibrahim Hadžibajrić, dogradonačelnik Aljoša Čampara i Snježana Derviškadić, u ime USAID-a.

Projekat "Centra za doček posjetitelja" kreirali su Zona unaprijeđenog poslovanja (ZUP) Baščaršija i Fondacija Sarajevo navigator u svrhu upotpunjavanja turističke ponude Sarajeva tokom ovogodišnje ljetnje turističke sezone,

kada se očekuje povećan broj dolazaka turista. Centar za doček posjetitelja raspolaže suvenirnicom, Info punktom sa mapama, prospektima i drugim smjernicama koje će biti na raspolaganju posjetiocima, te kafeom gdje će posjetioci moći potražiti osvježenje. Također, postavljeno je i veliko platno za projekcije na kojem će se emitovati promotivni filmovi o Sarajevu, sarajevskom atentatu i drugo, a navečer će se prenositi utakmice sa Svjetskog fudbalskog prvenstva koje se održava u Brazilu.

"Centar za doček posjetitelja" radit će svakodnevno od 8.00 do 23.00 sata.

Vijećnici održali predavanje učenicima srednjih škola

Predstavnici zakonodavne vlasti Općine Stari Grad Sarajevo bili su 26. juna predavači učenicima drugih i trećih razreda srednjih škola iz općina Stari Grad, Foča, Istočna Ilidža i Vogošća. Teme predavanja bile su: "Organizacija, struktura i nadležnosti rada Općinskog vijeća" - o čemu je govorio predsjedavajući Općinskog vijeća Vedran Dodik, zatim "Uloga mladih u politici" - o čemu je govorio vijećnik Irfan Čengić, dok su o temi "Uloga žena u politici" govorile vijećnice Alma Jašarević i Amila Olovčić.

Predavači su prisutnima detaljnije govorili o radu Općinskog vijeća, njegovim nadležnostima, o nacionalnoj

i polnoj zastupljenosti u Vijeću, kako se biraju vijećnici, o budžetu, projektima i sličnim temama.



Srednjoškolicima održano predavanje

Pet novih lipa u Aleji ambasadora

Ambasadori Švedske, Holandije, Evropske unije, Pakistana i Turske u BiH Stefan Fredrik Schiller, Jurriaan Kraak, Peter Sørensen, Syed Khalid Amir Jaffery i Ahmet Jildiz, s načelnikom Općine Stari Grad Ibrahimom Hadžibajrićem, zasadili su 126, 127, 128, 129. i 130. stablo lipu u Aleji ambasadora. Sretni zbog pružene prilike da zasade lipu, ambasadori su se zahvalili načelniku Hadžibajriću.

“Tradicija je lijepa i počastvovan sam što je moje ime tu, zajedno s imenima mojih kolega. U Sarajevu sam već osam mjeseci, upoznajem grad i moram naglasiti da smo supruga i ja vrlo sretni što smo ovdje”, kazao je ambasador Schiller.

Holandski ambasador Krak ponosan je na učešće u tradicionalnom projektu i dodao je da je ovo jedan od pokazatelja dobrih odnosa Holandije i BiH koji će se nastaviti.

Komentirajući veliki broj ambasadora koji je do sada posadio lipu u Aleji amba-



Stefan Fredrik Schiller



Jurriaan Kraak



Peter Sørensen



Syed Khalid Amir Jaffery



Ahmet Jildiz

sadora, ambasador Sorensen je ocijenio kako je važno za BiH da ima toliko pri-

jatelja koji zaista žele da BiH ima svoje mjesto kojoj joj pripada, a za njega je to u Evropskoj uniji.

“To također pokazuje s koliko topline i prijateljstva primite nas koji dolazimo ovdje, što zaista pokazuje kako ste vi toplo društvo”, kazao je Sorensen.

“Zahvaljujem se načelniku Hadžibajriću što je organizovao sadnju ove lipu. Sadnja drveća je jako stara tradicija, pa čak i u našem dijelu svijeta. Ona označava prijateljstva.”, kazao je Jaffery.

“Vjerujem da će lipa rasti i jačati, kao i stogodišnji lijepi i bratski odnosi naših država, u miru i prijateljstvu”, kazao je turski ambasador Jildiz.

Svi ambasadori na jednom mjestu

Aleja ambasadora, projekat koji je zaživio 2002. godine šetnicom duž rijeke Miljacke gdje je izgrađen zid dužine 700 metara iznad kojeg su sadene lipu, danas se prostire na dužini većoj od jednog kilometra i broji čak 130 stabala. Od prve lipu koju je zasadio tadašnji visoki predstavnik OHR-a u BiH, Wolfgang Petrich, prošlo je 12 godina, a u Aleji su svoj pečat ostavili gotovo svi akreditirani ambasadori u našoj zemlji. I pored brojnih problema sa kojima se Općina suočava u očuvanju ovih sadnica, jer su neodgovorni pojedinci čupali stabla i lomili ploče i klupe, te su morali biti zamijenjeni novima, Aleja izrasta u sve ljepše šetalište i omiljeno izletišta brojnih Sarajlija. S obzirom da je od ove godine Općina realizovala i projekat uspostavljanja Info-press centra na Bašaršiji, fotografije svih 130 ambasadora i lipa koje su zasadili izloženi su na panoima postavljenim u ovom objektu i mogu se pogledati.



Unaprijeđenje uloge lokalnih vlasti

Generalna skupština Mreže lokalnih vlasti jugoistočne Evrope (NALAS) u kojoj je učestvovalo 16 udruženja iz 12 gradova, a među njima i Savezi općina i gradova Federacije i Republike Srpske, održana je 10. aprila. Domaćin ovogodišnjeg kongresa bila je Općina Stari Grad Sarajevo, s načelnikom Ibrahimom Hadžibajrićem na čelu, koji je ovom prilikom govorio o potrebi sinhronizacije zakona na svim nivoima vlasti. “Ovakvi razgovori, razmjena iskustava, iniciraju naš zajednički pomak naprijed. BiH je potpisnica Povelje o lokalnoj samoupra-



Općina bila domaćin kongresa

vi, međutim, ona nikada nije ispoštovana do kraja, kao ni Odluka Ustavnog Suda BiH o decentralizaciji vlasti. U takvim okolnostima, činimo sve što možemo u interesu građana, jer smo im najbliži u rješavanju njihovih problema”, naglasio je Hadžibajrić.

Skupštini su se, pored Hadžibajrića, obratili i predsjednik NALAS-a gradonačelnik Trzina iz Slovenije Anton Persak, Husein Smajlović, predsjednik Saveza općina i gradova FBiH, te Nenad Samardžija, gradonačelnik Istočnog Sarajeva.

Predstavljamo uspješne male privrednike iz Starog Grada

Žena koja već 20. godina sama uzgaja stoku

Šaćira Fočo, samohrana majka troje djece, iz naselja Faletići, najuspješniji je uzgajivač ovaca i krava u općini Stari Grad Sarajevo. Njeno stado broji više od 100 grla, a bilo bi, kako kaže, i mnogo brojnije kada bi njih u kući bilo više.

Sve prodaja na kućnom pragu

“Zajedno sa kćerkom proizvodim mlijeko, sir, kajmak, a ponekad prodamo i meso od teleta. Ljudi već znaju za nas i nema potrebe da bilo šta nosim na pijacu. Uglavnom sve prodam u komšiluku”, priča Šaćira.

Priznaje da se, bez obzira na veliko odricanje i težak rad iz dana u dan, nije pokajala što je poslije starog dijela grada.



Pored ovaca, ima šest krava i dva teleta



Stado broji više od 100 grla

Nada se da će država u narednom periodu početi značajnije da stimulise ljude koji žele da se bave stočarstvom i da na svojim posjedima proizvode zdravu hranu.

“Jedina pomoć koju dobijemo je od

Već 20. godina bavi se stočarstvom

Ostala sam mlada bez muža, s troje male djece. Rat se bio tek završio, posla ionako nije bilo i ja sam odlučila se počnem baviti stočarstvom. Prihvatila sam se ovog posla, jer smatram da stočarstvo ima dobru budućnost, bez obzira što je to težak posao. Sa-gradila sam dvije štale i ne stidim se da ih svima pokažem. Ovce i krave su, hvala Bogu, zdrave i napredne, s ponosom ističe stočarka sa Faletića.

Općine Stari Grad koja nas stimulise ili pomaže u sanaciji štala”, ističe Šaćira.

Ljeti ima više posla

“Svima je poznato šta za ljudsko zdravlje znače domaće mlijeko i sir. To su izuzetno kvalitetni i zdravi proizvodi i mislim da je cijena našeg sira od dvije i po do tri marke za kilogram preniska”, priča Šaćira.

Prema njenim riječima, najveća podrška u poslu joj je najmlađa kćerka, koja se brine za ovce i krave, a najviše posla ima ljeti kada za stado treba pripremiti hranu za dugu i hladnu zimu.

“Ništa ne bih mogla uraditi bez svoje

kćerke. Vrijedna je, sposobna i uvijek mi se nađe pri ruci. Ja sam naučila da radim i radiću dok god budem mogla, poručuje stočarka Šaćira Fočo.

Prosječno bude oko 20 litara mlijeka dnevno

Imam šest krava i dva teleta. Meni je najvažnije da su zdravi i napredni. Svake godine životinje se testiraju i provjerava se ispravnost mlijeka. Što se tiče količine, mlijeka bude onoliko koliko se kvalitetno hrane krave. Muzu se tri puta dnevno, a prosječno bude oko 20 litara mlijeka po kravi.



Šaćira sa janjetom starim sedam dana

Stavo Sarajevo

Piše: **MUFID GARIBIJA**, sarajevski arhitekta

Sarajevski atentat

Na Berlinskom kongresu 1878. godine Bosna je data na upravljanje Austro-Ugarima. Ovaj čin nije naišao na odobravanje stanovništva u našoj zemlji, naročito tadašnjih muslimana i pravoslavaca, koji su digli ustanak i oružjem pokušali odbraniti Bosnu. Ovaj ustanak poslije je doprinio većem angažmanu novih osvajača u pokušaju približavanja naroda i nove vlasti, što su radili na svim poljima.

dan, bio je planiran i zvanični dolazak u grad kako bi održao govor u Vijećnici. Te sedmice, zajedno sa suprugom Sofijom, stigao je vozom s Ilidže do Fabrike duhana na Marindvoru, odakle je u povorci od šest automobila obalom Miljacke krenuo ka Vijećnici. Jaka veza Sarajeva i Beča, te njihovih građana, bila je razlog za veliko gostoprimstvo koje su Sarajlije ukazale prijatelju Ferdinandu, ali su opće

Vozilo se greškom zaustavilo kod Latinske ćuprije

Priestolonasljednika je prvi pokušao ubiti Nedeljko Čubrilović, bacivši bombu koja se odbila o automobil koji je prevozio Ferdinanda i otkotrljala pod naredno vozilo. U eksploziji je povrijeđen baron Merizija, dok je ostatak kolone velikom brzinom produžio prema Vijećnici. Povrijeđenog barona prebacili su u Vojnu bolnicu.

Ferdinand je zatražio da mu ode u posjetu, a guverner BiH Potiorek predložio je da se, zbog sigurnosnih razloga, ide putem mimo protokola.

Prihvatio je prijedlog, ali je i glasno prokomentirao: "Čini mi se da ćemo mi danas dobiti još nekoliko kuglica." Intuicija ga nije varala. Nekoliko minuta poslije vozilo s Francom Ferdinandom i vojvotkinjom Sofijom greškom se zaustavilo kod Latinske ćuprije, a Gavrilo Princip iskoristio je trenutak, pucao i ubio carski bračni par i njihovo nerođeno dijete. Odmah nakon atentata, Austro-Ugarska monarhija dala je neprihvatljiv ultimatum Srbiji i započeo je veliki rat, poslije nazvan Prvi svjetski rat.

Gavrilo Princip nije bio osuđen na smrt, jer je sa 17 godina smatran maloljetnikom pa mu je izrečena kazna doživotnog zatvora. Preminuo je nakon četiri godine robije, a uzrok smrti bila je tuberkuloza.



Ferdinand došao na vojne manevre

Najveće žrtve i najveći otpor bili su u Sarajevu, ali je tu poslije nova vlast i najbolje prihvaćena. Ovakvu atmosferu, koja je trajala tridesetak godina, pokvarile su nacionalističke ideje koje su se budile u regiji. Tako je osnovana organizacija "Mlada Bosna", koja je bila vezana za srpsku organizaciju "Crna ruka", poznatu i pod nazivom "Ujedinjenje ili smrt", koja je borbu za "veliku Srbiju" imala upisanu i u svoj statut. Bilo je članova "Mlade Bosne" koji su se zalagali i za ideju ujedinjenja južnih Slavena, ali su oni bili u manjini. Na čelu "Crne ruke" nalazio se Dragutin Dimitrijević Apis, šef Obavještajne službe Srbije. Njegova organizacija je planski, logistički i ideološki potpomagala i opremala "Mladu Bosnu", čiji su članovi naposljetku izvršili atentat na austrougarskog prijestolonasljednika Franca Ferdinanda (Franz) i njegovu suprugu Sofiju. Ferdinand je došao u Sarajevo prije tačno stotinu godina da bi prisustvovao vojnim manevrima, zakazanim za 26. i 27. juni, a 28. na Vidov-

oduševljenje pokvarili pripadnici "Mlade Bosne". Atentatori su se rasporedili na šest mjesta duž putanje kojom će kolona proći. Plan rasporeda za teroristički čin i ubistvo Franca Ferdinanda napravili su Danilo Ivić, Gavrilo Princip i Trifko Grabež, a atentatori su se rasporedili od Drvenije do Latinske ćuprije.





Na konjima od At mejdana do Ajvatovice

Konjanici iz Sarajevskog džemata "Hidalgo" 18. juna su iz Parka At mejdan krenuli ka Pruscu na obilježavanje 504. Ajvatovice. Ispratio ih je Ibrahim Hadžibajrić, načelnik Općine Stari Grad koji je barjak na kojem se viori zastava Općine Stari Grad predao je Hakiji Rizviću, barjaktaru. Na ovogodišnji pohod na Ajvatovicu iz Sarajeva je krenulo više od 20 konjanika.